

In mais da pais

Las lingias grassas e finas dal favrer 2020

DA DAVID TRUTTMANN/FMR

Tut che chanta gloria: En temps nua che las baselgias sa svidan vulan quels da Schons construir ina chaplutta «drive-in» sper l'autostrada. Però i dat vuschs che disturban il bler gloria perquai ch'i teman dapli traffic tras Andeer. Silmain fiss la chaplutta alura plaina.

Il nov plevon da Surses, quel sumeglia – sco gia scrit en gasetta – plitost a Bud Spencer che a Don Camillo. Ussa vul el mussar en avegnir films cun temas religius en ses agen kino. Probablmain ch'el vegn a mussar a sia raspada er «Vier Fäuste für ein Halleluja».

Ed anc in alleluia: Il Chantun ha decidì d'installar in post da coordinaziun en l'administraziun chantunala che tegna tgira da la plurilinguitad. Igl ha duvrà ina digren massiva dal rumantsch e studis si da l'Aargau per vegnir a quella conclusiun. Uss èsi mo pli da coordinar bain bain nua che quel post da coordinaziun pudess vegnir installà exact. En la chanzlia u en in departament u forsa or en las regiuns. Buna coordinaziun!

La Lia Rumantscha fa da Big Brother. Ella va en in container – u meglier ditg en in stan a la Higa. Ensemen cun vischins ta-



lians e gualsers. Interessant è ch'i dat in mais avant la Higa ina conferenza da pressa a Haldenstein per annunziar quella convivenza en in «container». Forsa fissi

d'avantatg en avegnir da far gia avant Nadal ina conferenza da pressa per annunziar ch'ins fetschia il favrer ina conferenza da pressa, la quala renda alura attent

ch'ins saja preschent a la Higa la fin da mars. Quai fiss PR camifo. Uschia na stuessan nus gnanc pli ir a la Higa perquai che tut è gia enconuscent.

Scandal a la curt dal Tribunal chantunal? Èsi propi vair che sentenzias èn vegnidas curregidas e surscrittas? La coincidenza è però frappanta: Aveva il tribunal er in da quels apparats si da Zug, da la Crypto AG, per transformar discussamain messadis e sentenzias?

Tschaiver total l'entir mais. Quai n'è betg stà da surveisar en las gasettas. Fotografias da Bagordas, Fifferlottas, Lieurs, lufs, rachetas, trumbettas, Trumps e plastic. La FMR è vegnida crititgada da publitgar memia bler holdrio da tschaiver. Nus dain per risposta: Po dar. Ma uss avais vus paus per in onn.

Euspè duas Engiadinaisas che gudognan premis litterars: las poetessas Leta Semadeni e Jessica Zuan. Ina va per in premi en Germania (Semadeni) e l'autra (Zuan) cun premis da promoziun dal Chantun e da l'Engiadin'Ota. Damai per recapitular: il schaner Flurina Badel e Romana Ganzoni, il favrer Leta Semadeni e Jessica Zuan. Quai fa in total da quatter. Enfin la fin da l'onni vegnan damai

premiadas totalmain 24 auturas engiadinaisas.

Questas lingias grassas e finas han era dà da discutir: Nagins radis da 5G giu dal clutger da Scuol. Il moderatur dad SRF, Nik Hartmann, ha cuschinà schuppa sin il Pass da l'Alpsu. I dat vuschs che giavischassan dapli schuppa da Hartmann e damain emissiuns cun el. La vischnanca da Lon en Val Schons è la suletta en l'entir Grischun ch'ha ditg gea a l'iniziativa per abitaziuns pajablas. Ubain ch'ils tschains a Lon èn exorbitants u che la vischnanca è in veritabel paradis per socis. Ed alura gea, il virus da Corona ha spluntà vi da la porta grischuna. Però sur da quai datti da scriver segiramain dapli il proxim mais (sche la redacziun da la FMR n'è betg en quarantina).

In mais da pais

(fmr/dat) Tgeninas èn stadas las lingias grassas e finas dal mais passà en Rumantschia, en Grischun ed in-summa? Quai ans dumandain nus da la FMR mintga fin dal mais. Tge paisa e tge paisa mo in zichel? Nus laschain repassar schabetgs, dain ina survista fitg casuala e commentain quai cun in surrir. A partir da quest mais illustrescha il Bregagliot rumantsch Jon Bischoff in dals schabetgs cun in «schurnal grafic».